



Sud Bosne i Hercegovine
Суд Босне и Херцеговине

Broj: S1 3 Iž 039529 21 Iž
Sarajevo, 18.01.2021.godine

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija Mirsade Džindo, predsjednik vijeća, dr Branka Moraita i Zvezdane Antonović, članovi vijeća, odlučujući o žalbi Bečić Armina, akreditovanog posmatrača, izjavljenoj protiv odluke Centralne izborne komisije Bosne i Hercegovine broj: 05-1-07-5-46/21 od 08.01.2021. godine, u nejavnoj sjednici, održanoj dana 18.01.2021.godine, donio je

R J E Š E N J E

Žalba se odbija kao neosnovana.

O b r a z l o ž e n j e

Odlukom Centralne izborne komisije Bosne i Hercegovine, broj i datum kao u uvodu, odbijen je zahtjev za ponovnim brojanjem glasačkih listića na određenim biračkim mjestima u izornoj jedinici 1 (Sjever) 154 sa Lokalnih izbora 2020. godine u Gradu Mostaru.

Protiv navedene odluke žalitelj je blagovremeno izjavio žalbu zbog pogrešno utvrđenoig činjeničnog stanja i zbog pogrešne primjene materijalnog prava. Žalitelj u žalbi navodi da je CIK BiH naredila ponovno brojanje glasačkih listića na jednom od biračkih mjesta za koja je žalitelj i poodnio zahtjev za ponovnim brojanjem i to po kandidatima političkog subjekta Koalicija za Mostar 2020., te zahtijeva da se i na tri preostala biračka mjesta za koja je tražio ponovno brojanje (154A006, 154A004 i 154A010) izvrši ponovno brojanje glasačkih listića.

Centralna izborna komisija Bosne i Hercegovine u odgovoru na žalbu je predložila se ista odbije kao neosnovana.

Žalba nije osnovana.

Prema stanju u spisu predmeta, CIK BiH je, na zahtjev Gradske izborne komisije Mostar, izdala naredbu u cilju pravilnog objedinjavanja izbornih rezultata

izbora za nivo izborne jedinice 1 (Sjever) 154 na biračkom mjestu 154A007C i za nivo gradske izborne jedinice 199 na biračkom mjestu 154A006. To je učinjeno na propisan način, nakon razmatranja podnesenih zahtjeva za ponovno brojanje glasačkih listića koji su bili činjenično potkrepljeni i dokumentovani u skladu sa članom 5.30 stav (4) Izbornog zakona BiH i u smislu odredbe člana 5.30 stav (5) Izbornog zakona BiH („Službeni glasnik BiH“, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 33/08, 37/08, 39/08, 32/10, 18/13, 7/14, 31/16 i 41/20), po službenoj dužnosti.

Podnosilac žalbe je naveo „da su na navedenim biračkim mjestima učinjene određene nepravilnosti koje su rezultirale pogrešno utvrđenim brojanjem glasova za pojedine kandidate“. I prema shvatanju ovog sudskog vijeća, žalitelj je trebalo da postupi u smislu odredbe člana 6.2 stav (1) Izbornog zakona BiH, u kojoj je propisano da birač odnosno politički subjekt čije je izbornopravo povrijeđeno može izbornoj komisiji uložiti prigovor u roku od 48 časova, odnosno u roku od 24 sata u izbornom periodu od učinjene povrede, što u konkretnom slučaju znači da je žalitelj, kao akreditovani posmatrač trebalo da putem svog političkog subjekta, Koalicije za Mostar uložiti prigovor nadležnoj izbornoj komisiji, na čiju odluku bi imao pravo žalbe CIK BiH, u skladu s odredbom člana 6.6 stav (2) Izbornog zakona BiH. Žalitelj nije koristio ni mogućnosti propisane odredbom člana 5.7 stav (2) Izbornog zakona BiH, da u zapisnik o radu biračkog odbora unese svoje mišljenje ili primjedbe na proces glasanja, a ako mu to bude onemogućeno, iste se dostavljaju opštinskoj izbornoj komisiji, u smislu primjene člana 5.7 stav (3) Izbornog zakona BiH.

Neosnovanost žalbe ovo vijeće ocijenjuje iz razloga što uz tvrdnje koje su iznesene nisu priložena bilo kakva dokazna sredstva ili materijali kojim bi ove tvrdnje bile potkrepljene. Isto tako, žalitelj u žalbi priznaje da u zapisnik sa pomenutih biračkih mjesta nisu unijete bilo kakve primjedbe. Na kraju, žalitelj navodi da se njegova žalba ne odnosi na postupak glasanja, nego o nepravilnostima u postupku utvrđivanja rezultata glasanja odnosno brojanja glasačkih listića, kojem postupku žalitelj nije prisustvovao tako da nije mogao ni uočiti navodne nepravilnosti ili neregularnosti i kršenja Izbornog zakona BiH.

Iz navedenih razloga apelaciono vijeće nalazi da je pobijana odluka Centralne izborne komisije Bosne i Hercegovine pravilna i zakonita, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, br. 19/02, 88/07, 83/08 i 74/10) valjalo odbiti.

**PREDSJEDNIK VIJEĆA
S U D I J A**

Mirsada Džindo